

# **Phawuloosi Filphisiyuusa Asaas Xaafida Kiitaa Gaatha Qofaa**

Phawuloosi Filphisiyuusa asaas xaafida kiitay xaafetiday, Roome biittan Maqedooniya awurajjan, Filphisiyuusa biittan de7iya woosa keethaassa. He woosa keethay Phawuloosi Awuropqa biittan koyro essida woosa keethi. Ha kiitay xaafetiday, Phawuloosi qasho keethan de7iya wode hara ammaniyaa oosanchchot iya ixxida wodenne Filphisiyuusa woosa keethan dendida worddo timirttiya gaason iya wozanay daro azzanida wode. Gidoshin, Phawuloosi Yesuus Kiristtoosa minthidi ammaniyaa gisho ha kiitan qonccidi benttey, ufayssinne kumetha ammanetethi. Filphisiyuusan de7iya daro asay Roomeppe di7ettidi yida asi. Entti Roome biittaas mishettoosonanne loythi naagoosona. Enttafe issoti issoti ammanidi bantta biitta asan goodettidosona. He gooday entta bolla metonne manqotethi ehis (Ha.O 16:20-21).

Phawuloosi ha kiitaa xaafida koyro gaasoy iya metuwa wode iya maaddanaw Filphisiyuusa ammaniyaa asay imota iyaw yeddida gisho entta galatanaassa. Iya bollanne entta bolla dumma dumma metoy gakkidabaa gidikkoka entti minettana melanne kumethi ammanettidi daana mela ha demmida injjiyan entta minthethees. Ceeqonne otoro aggidi, Yesuus Kiristtoosa

ashkketethan entti kumana mela minthidi entta akekisees. Yesuus Kiristtoosara issife gidon entti demmida de7oy Xoossaa aadho keehatethaafe pulttidayssanne ammanon entti ekkidayssafe attin Ayhudeta wogaa polon benttidabaa gidonnayssa entta akekisees. Yesuus Kiristtoosara issife de7iya ubbaas Xoossay immiya saruwanne ufayssaa enttaw xaafees.

Ha kiitay erettey ufayssi, ammanetethi, is-sifetethinne ammanon minnidi de7o qonccisidi besseyssana. Hessa bolla gujjidi, Phawuloosi Filphisiyuusa woosa keethaa siiqiya gita siiquwa qonccisees.

### **Filphisiyuusa kiitaa ayfe qofata**

Gelo qofaa 1:1-11

Phawuloosi hanidi de7iya duussaa 1:12-26

Ammanon leemiso de7o 1:27-2:18

Ximotiyooasasinne Ephphaafiraditus de7iya qofaa 2:19-30

Morkketappenne iitatappe naagetethi 3:1-4:9

Phawuloosanne Filphisiyuusa ammaniaya asaa 4:10-20

Sarothonne anjjo 4:21-23

<sup>1</sup> Kiristtoos Yesuusara issifida gisho Xoossabaa gidida, Filphisiyuusa kataman de7iya woosa keethaa cimatasinne daaqoneta ubbaas. Yesuus Kiristtoosa aylle gidida, Phawuloosappenne Ximotiyooosappe kiittida kiitaa.

<sup>2</sup> Nu Aawa Xoossaafenne Godaa Yesuus Kiristtoosappe aadho keehatethaynne sarotethay hintew gido.

*Phawuloosa galata woosaa*

**3** Taani hinttena qoppiya wode ubban, ta Xoossa galatays.

**4** Taani hintte ubbaas Xoossaa woossiya wode ufayssan woossays.

**5** Hintte koyro gallasappe ha77i gakkanaw, Wonggelaa markkateyssan taara issife gididi, tana maaddida gisho Xoossaa galatays.

**6** Hintte giddon lo77o ooso doomida Xoossay, Kiristtoos Yesuusi simmiya gallasay gakkanaw, polanayssa erays.

**7** Hintte ubba wode ta wozanan de7eeta. Taani ubba wodekka hessada qoppanaw bessees. Ha77i taani qashon de7ashenne qashettanaappe sinthe Wonggelaa naagoninne Wonggelaa mintha eson Xoossay taw qaadida qaadaa hintteka taara shaakettideta.

**8** Taani hinttena ubbaa Kiristtoos Yesuusa siiquwan ay mela laamotiyakko Xoossay taw markka.

**9** Hintte siiqoy tuma eratetharanne akeekara issife gujji gujji diccana mela Xoossaa woossays.

**10** Hessian hintte lo77obaa shaakkidi, dooreyssata, Kiristtoosi simmiya gallasan geeshshatanne borettonnayssata gidana.

**11** Hintte de7oy Xoossaa bonchchuwasinne galatas Yesuus Kiristtoosa baggara benttiya xillotethaa ayfyaan kumidi ayfana.

### *Phawuloosa qashetethay Wonggelay dalggana mela maaddis*

**12** Ta ishato, tana gakkida ubbay Wonggelay dalggana mela tuma maaddidayssa hintte erana mela koyays.

**13** Taani Kiristtoosa gisho qashettidayssa, kawo keethaa naageyssatinne hayssan de7iya harati ubbay eroosona.

**14** Ta qashuwa gaason nu ishatappe daroti Godan keehi ammanettidosona. Hessa gisho, Xoossa qaala yashshi baynna kaseyssafe aadhdhi minnidi odana mela minotethi demmidosona.

**15** Gidoshin, issoti issoti qanaateninne palaman Kiristtoosabaa odoosona, shin harati suure wozanappe odoosona.

**16** Suure wozanappe odeyssati, Xoossay taw Wonggelaa naago ooso immidayssa eriya gisho siiqon odoosona.

**17** Shin tana qanaateyssati ta qashuwa bolla hara meto ehanabaa enttaw daanin banttana dosidi Kiristtoosabaa odoesonappe attin tuma wozanappe odokkona.

**18** Hessi aykkoka metenna. Tuma ogen gidin woykko worddo ogen gidin he ubban Kiristtoosi sabbakettees. Tana hessi ufayssees. Qassi harabay tana ufayssiyabay,

**19** taani hintte woosaninnee Yesuus Kiristtoosa Ayyaana maaduwaa attanayssa eriya gisho tana ufayssees.

**20** Ta gita amoynne ufayssan naagiya naagoy ta yeellatonna attanayssa. Shin ubba wode ootheyssada, ha77ika taani paxa de7in woykko hayqqin yayyonna ta kumetha asatethan Kiristtoosi bonchchettana gada minotethan odays.

**21** Ta de7ikkoka Kiristtoosa xalaalas de7ays; qassi ta hayqqikokka taw aadhdhida wodhe.

**22** Shin ta paxa de7ikko ayfey de7iya ooso oothana. Shin paxa de7eyssafenne hayqoppe awussa dooranekko taw erettenna.

**23** Taani ha nam77atappe awussa dooranekko un77ettas. Ha de7uwappe shaakettada Kiristtoosara issife daanaw amottays; Kiristtoosara issife de7eyssi ubbaafe aadhdhida lo77o.

**24** Shin taani hintte gisho paxa de7eyssi hinttew daro koshshiyabaa.

**25** Hessa taani geeshshada erays; taani, hintte ammanon diccanaadanne ufayttanaada hinttera paxa daana.

**26** Hessa gisho, taani hintteko simmada yaa wode Kiristtoos Yesuusara hintte de7iya de7uwan tanan de7iya ceeqetethay hinttew darana.

**27** Ubbaafe aathidi, hintte Kiristtoosa Wonggelaas bonchcho ehiya de7o de7ite. Ta hinttena be7in woykko be7onna ixxin hintte issi qofan minnidi eqqidi, harati Wonggelan ammanana mela issi wozanan gididi issife baaxeteysa ta si7ana.

**28** Hintte morkketas yayyofite. Entti hinttera eqettiyyaba gidikko hessi hinttew atotethaas, enttaw dhayos Xoossaafe gidida malla.

**29** Kiristtoosas oothiya qaaday hinttew imetti-day, hintte iya ammanana mela xalaala gidonnashin hintte iya gisho meto ekkana melassa.

**30** Hessa gisho, hintte ta waaya kase be7ideta; ha77ika ta waayetteyssa si7eeta. Hintteka ta waaya mela waayetteeta.

**2***Tuma ashkketethi*

<sup>1</sup> Kiristtoosan hintte de7iya de7oy hinttena minthees; qassi iya siiqoykka hinttena minthethees. Geeshsha Ayyaanaara hinttew issifetethi de7ees; hintte haratas kehetanne qadhetteeta.

<sup>2</sup> Hiza, hintte issi qofan, siiqon, issi wozananinne ayyaanin issino gididi tana polo ufyasssite.

<sup>3</sup> Hinttena doson woykko ceeqettiya hada amon issibaakka oothofite. Shin hintte issoy issuwafe gitatays yaagidi qopponna hinttena kawushshite.

<sup>4</sup> Hintte issoy issoy, hara asi maaddiyabaa koyiteppe attin hinttena maaddiyabaa xalaala koyoppite.

<sup>5</sup> Kiristtoos Yesuusan de7iya qofay hinttenan daanaw bessees.

<sup>6</sup> Iyaw ubba wode Xoossaan hanotethi de7ees.

Yaaniya gisho, iya Xoossaara issino oothiya hanotaa,  
wolqqan ekkanaw koyibeenna.

<sup>7</sup> Gidoshin, I baw de7iya bonchchuwa ubbaa ag-gidi,  
aylle medheta ekkis;  
ase daanidi qonccis.

<sup>8</sup> I bana kawushshis;  
hayqqana gakkanaw,  
hari attoshin masqaliya bolla  
hayqqanaw kiitettis.

<sup>9</sup> Hessa gisho, Xoossay iya daro dhoqqu dhoqqu oothis;

qassi suntha ubbaafekka aadhdhiya dhoqqa  
sunthaa immis.

<sup>10</sup> Saloninne sa7an,  
sa7appe garssan de7iya ubbay,  
Yesuusa sunthaa bonchchuwas gulbbatana.

<sup>11</sup> Asa ubbay bantta inxarssan,  
Yesuus Kiristtoosa Goda yaagidi,  
Xoossaa Aawa bonchchuwas markkattana.

### *Ha alamiyas poo7o gido*

<sup>12</sup> Ta ishato, taani hinttera de7iya wode ubban hintte kiittidayssada, ha77i taani hintte matappe haakkinkka, kaseyssafe aathidi, kiittanaw bessees. Xoossaas yashsharinne kokkorssan hintte atotethaa polanaw oothite.

<sup>13</sup> Xoossay, hintte iyaw ero gidi kiittana mela ubba wode hintte giddon oothees.

<sup>14</sup> Ay ooso oothishekka zuuzummonna woykko palamonna oothite.

<sup>15</sup> Geellanne nagaranchcho asaa giddon borettonnayssata, geeshshatanne pokkoy baynna Xoossaa nayta gidite. Hintte entta giddon salo xoolinttoda poo7ishe,

<sup>16</sup> de7o immiya kiitaa enttaw odite. He wode ta daaburissaynne ta oosoy mela attiboonna gisho Kiristtoosi yaa gallas ta hinttenan ceeqettana.

<sup>17</sup> Hintte Xoossaas immiya ammano imotaa bolla ta suuthay ushsha yarshshoda\* gukkikokka tana ufayssees. Hintteka taara ufayttana.

**2:10** Isa 45:23    **2:15** Zaare 32:5    \* **2:17** *Ta suuthay ushsha yarshshoda:* Issi issi wode yarshsho bessan yarshshettiya mehe yarshshuwa bolla haathe woykko woyne ushshay gukkees.

**18** Hessada hintteka ufayttidi tanakka ufayssanaw bessees.

*Ximotiyooseanne Ephphaafiraditusa*

**19** Taani hintte de7uwabaa si7ada ufayttanaw Ximotiyooosa hintteko ellesada yeddana mela Godaa Yesuusi tana maaddanayssa ammanettays.

**20** Hintte de7uwas wozanappe qoppiya iya mela asi hari oonikka baawa.

**21** Harati banttana go77iyabaa koyoosonappe attin Yesuus Kiristtoosi koyabaa oothokona.

**22** I taara issife gididi na7i ba aawas ooheyssada Wonggelaa ooso oothidayssanne ammanettiya asi gideyssa hintte ereeta.

**23** Hessa gisho, tabay haniyabaa be7ada ellesada iya hintteko yeddana gada qoppays.

**24** Taani, ta huu7en mata woden hintteko baanayssa Godan ammanettays.

**25** Hessadakka, taani, ta ishaa Ephafiroditusa, taara issife ta bagga gididi oothidayssa, olettidayssanne, tana maaddanaw hinttew kiittidayssa, hintteko kiittanaw qoppas.

**26** I hinttena ubbaa be7anaw daro laamotees. Qassi I harggettidayssa hintte si7ida gisho ba wozanan daro un77ettis.

**27** Ituma harggettidi hayqqi kichchidi attis. Shin Xoossay iyaw qadhettis. Iya xalaalas gidonnashin azzanoy azzano bolla guzhettonnaada, tawukka qadhettis.

**28** Hiza, hintte iya zaari be7idi ufayttanaada tawukka ta wozanaa seelay irxxanaada taani iya ellesada hintteko yeddanaw amottays.

<sup>29</sup> Godaas haggaaziya asada iya kumetha ufayssan mokkite. Qassi iya mela asa ubbaaka bonchchite.

<sup>30</sup> Hintte ta matan gididi oothanaw dandda7onna maadiya maaddidi Kiristtoosa oosuwa gisho ba shemppuwas mishettonna ixxidi hayqqi kichchidi attis.

### 3

#### *Tuma xillotethaa*

<sup>1</sup> Wurssethan, ta ishato, hintte Godaaba gidiya gisho ufayttite. Taani kase xaafidayssa zaarada xaafanayssi tana waaysenna, shin hinttena balappe naagana.

<sup>2</sup> Iitabaa oothiya kanatappe, qassi qaxxaret-tanaw koshshees giya iita asatappe naagettite.

<sup>3</sup> Nuuni Xoossa Geeshsha Ayyaan goynniya gishonne nu de7uwan Kiristtoos Yesuusan ceeqettiya gisho tuma qaxxaro qaxxarettidayssata. Nuuni kare asatethaa bolla oosettiyaban ceeqettoko.

<sup>4</sup> Ta kare asatethan ceeqettanaw koshshiko ta daroban ceeqettanaw dandda7ays. Ay asikka ba kare asatethan ceeqettiyabay baw de7ees gidi qoppiko, taani iyappe daro aadhdhada ceeqettiyyabay de7ees.

<sup>5</sup> Taani yelettida saaminttara qaxxarettas. Taani yeletan Isra7eele; taani Biniyame zare; taani walaki baynna Ayhude ase. Ayhude higge naagon gidikko taani Farisaawe.

<sup>6</sup> Ayhude ammanuwas mishetethan gidikko taani woosa keethaa yedethas. Issi asi

higge naagidi xilliyaba gidikko, tanan borey benttibeenna.

<sup>7</sup> Shin kase tana maaddees gada qoppidabaa ubbaa, Kiristtoosa gisho gada maaddonnabaa oothada taybas.

<sup>8</sup> Hessa xalaala gidonashin taani ta Godaa Kiristtoos Yesuusa ereyssi haraba ubbaafe daro aadhdhiya gisho he ubbaa wodhey baynnabaada taybas. Taani iya gisho ubbabaa dhayas. Kiristtoosa demmanaw ubbabaa wora holettida buureda taybays. Taani Yesuusara issino gidas.

<sup>9</sup> Taani higges kiittada demmiya ta huu<sup>7</sup>e xillotethi taw baawa. Kiristtoosa ammanin benttiya xillotethay, Xoossa matappe yaa xillotethay ha<sup>77</sup>i taw de<sup>7</sup>ees.

<sup>10</sup> Taani Kiristtoosanne iya denddo wolqqaa eranaw koyays. Taani iya metuwa iyara shaaket-tanawunne iya hayquwan iya daananaw amottays.

<sup>11</sup> Hessadakka, hayqoppe denddada merinaw de<sup>7</sup>on daanayssa ufayssi oothays.

### *Gaxa gakkanaw woxxite*

<sup>12</sup> Taani ha<sup>77</sup>i gaxa gakkas woykko tanan bali baawa giikke. Shin Kiristtoos Yesuusi tana oykkida gisho taani ta sinthan de<sup>7</sup>iya woytuwa oykkanaaw woxxaysinne butetays.

<sup>13</sup> Ta ishato, taani hessa demmas gada qoppike, shin taani issibaa oothays. Taappe guyera de<sup>7</sup>eyssa dogada sinthan de<sup>7</sup>eyssa oykkanaaw zaturays.

**14** Hessa gisho, taani gaxa gakkanaw woxxays. Xoossay Kiristtoos Yesuusa baggara salo de7uwas xeegida woytuwa ekkanaw daaburays.

**15** Hiza, nuuni Ayyaan gashtida ubbay hessa qoppanaw bessees. Hinttefe baggatas dummat-tiya qofi de7ikko, hessaka Xoossay hinttew qonc-cisana.

**16** Gidikkoka, nuuni hanno gakkanaw de7ida de7uwan, ane sinthe boos.

**17** Ta ishato, tana daanite; hessadakka, nu leemisuwa kaalliya asata akeekidi be7ite.

**18** Taani hessa hinttew kase daro toho odas, shin ha77ika zaarada afuthan odays. Kiristtoosi masqaliya bolla hayqqidayssas banttana morkke oothisa daro asati de7oosona.

**19** Entta wurssethay dhayo; entta uloy enttaw xosse. Yeellatanaw bessiyaban entti ceeqet-toosona; qassi ha sa7abaa xalaala qoppoosona.

**20** Nu biittay saluwana. Saloppe yidi nuna ashshanaw de7iya Godaa Yesuus Kiristtoosa naagoos.

**21** Kiristtoosi ubbabaa ba maatappe garssan oothanaw dandda7iya ba wolqjan nu daaburanchcho asatethaa laammidi ba bonchcho asatethaa daanisana.

## 4

### *Wurssetha zore*

**1** Ta ishato, ta doseyssato, ta laamoteyssato, tana ufaysseyssato, tana gitayeyssato hisa Godan min-nidi eqqite.

<sup>2</sup> Ewoodinne Sinxiika, hintte nam77ay, issi qofan michchida Godan daanada taani hinttena zorays.

<sup>3</sup> Taara oothiya ammantheysso, neeni ha maccasata maaddana mela ta nena woossays. Ha maccasati taara, Qeleminxoosaranne entta sunthay Xoossa de7o maxaafan xaafettida haratara issife Wonggelaa ubba bessaa gathanaw daaburidosona.

<sup>4</sup> Godaara hintte de7iya de7uwан ubba wode ufayttite. Taani hessa gujjadakka odays; ufayttite.

<sup>5</sup> Asa ubbay hintte ashkketethaa ero; Goday matan yaana.

<sup>6</sup> Xoossa hintte woossiya wode ubban iya galatishe, hinttena koshshiyaba ubbaas woositeppe attin aybibaaskka hirggofite.

<sup>7</sup> Asa eratetha ubbaafe aadhdiya Xoossa sarotethay, hintte wozanaanne hintte qofaa Godaa Yesuus Kiristtoosa baggara naagana.

<sup>8</sup> Wurssethan, ta ishato, hintte wozanan lo77obaanne galatisiyabaa qoppite. Tuma gidiyabaa ubbaa, bonchchoba ubbaa, qoho gidonnaba ubbaa, geeshhaba ubbaa, siiqobaa ubbaanne ufayssiyaba ubbaa qoppite.

<sup>9</sup> Hintte taappe tamaaridabaa, ekkidabaa, si7idabaanne be7idabaa ubbaa oothite. Sarotethaa immi Xoossay hinttera issife gidana.

### *Phawuloosi imettida imotaas galatis*

<sup>10</sup> Daro wodeppe guye, hintte tabaa zaaridi qoppanaw doomida gisho taani Godan daro ufaytays. Hessa guussay, taw qoppanaw hinttew injetonna ixxidayssafe attin taw qofaa aggibeketa.

**11** Taani hessa tana metida gisho giikke; taw de7iyabay gidana guussu tamaaras.

**12** Taani metootettidi de7iya duussi erays; qassi durettidi de7iya duussika erays. Awun gidin qassi ay wodekka taani kalonne kosha, pacenne palaha tamaaras.

**13** Kiristtoosi taw immiya wolqqan ubbabaa oothanaw dandda7ays.

**14** Gidikkoka, hintte ta metuwa taara ekki-dayssan lo77o oothideta.

**15** Filphisiyuusa asaw, Wonggelaa koyro odanaw taani Maqedooniyappe keyaa wode immiyabankka ekkiyabankka hintte woosa keethaafe attin hari tana maaddiboonayssa hintte ereeta.

**16** Teselonqen metoy gakkida wodekka tana zaari zaaridi maaddideta.

**17** Taani, hinttefe imota ekkaw koyada gi-donnashin imoppe yaa anjuwaa hintte ekkana melassa.

**18** Taani, hintte immida ubbaanne gididi palaheyssa ekkas. Hintte yeddida ubbaa Ephafiraditusappe ekkas; koshshiyaba ubbay taw de7ees. Hintte taw yeddida imoy Xoossaas sawo tonggu giya, I dosiya, I ufayttiya yarshsho mela.

**19** Ta Xoossay ba bonchcho duretethaafe, Kiristtoos Yesuusa baggara hinttew koshshiyaba ubbaa immana.

**20** Nu Aawa Xoossaas merinaappe merinaa gakkanaw bonchchoy gido. Amin77i.

### *Wurssetha sarotaa*

**21** Kiristtoos Yesuusa baggara Xoossabaa gidida ubbaa saro giite. Taara de7iya ishati hinttena saro goosona.

**22** Xoossabaa gidida asa ubbay, ubbaafe aathidi Kauwa Qeesare keethan de7eyssati hinttena saro goosona.

**23** Godaa Yesuus Kiristtoosa aadho keehatethay hinttera gido.

## **Ooratha Caaquwa Goofatho New Testament in Gofa (ET:gof:Gofa)**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Gofa

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 18 Apr 2025 from source files  
dated 30 Dec 2021  
8695a6a5-d671-5199-996c-6069adce0ebd